

# «Persvadì d'avair prendì la dretga decisiun»

Il landamma da Tavau Tarzisius Caviezel ha inoltrà sia demissiun sin la fin da quest onn

CUN TARZISIUS CAVIEZEL  
HA DISCURRÌ MARTIN CABALZAR / FMR

■ Per surpraisa generala ha il landamma da Tavau Tarzisius Caviezel (66) communitgà ch'el na stettia betg pli a disposiziun per in'ulteriura perioda d'uffizi. La Quotidiana ha vulì savair ils motivs da sia renunzia sorprendenta e cun tge sfidas che la gronda vischnanca da Tavau è confruntada actualmain ed ils proxims onns.

*Vossa demissiun sco landamma da Tavau è apparentamain stada per tuts ins surpraisa. Esì era stà per Vos ina decisiun spontana e tge motivs han manà a questa decisiun?*

**Tarzisius Caviezel:** Esser spontan è bain bel e dinamic. Per mai è quai dentant stà ina decisiun persunala fitg impurtanta ch'è lu era stada fitg difficila da prender. Da laschar liber la vischnanca per la quala ins è s'engaschà cun corp ed olma en tut quels onns, quai n'è betg ina decisiun ad hoc. Ils 28 da zercladur 2020 han lieu a Tavau las elecziuns da tut ils gremis communal ed jau hai gia signalisà avant blers mais ch'jau vegnia a communitgar mia decisiun al cumenzament da l'onn electoral. Quai hai jau era fatg. I dat adina motivs per e cunter ina decisiun, per mai è la conclusiun dentant effectiv stada ditg intscherta. Jau hai ina relaziun fitg intima cun la vischnanca, sco sch'i fiss mia atgna interpresa. Da l'autra vart hai jau uss 66 onns e da sa metter a disposiziun e s'obligar anc ina giada per quatter onns sco landamma fiss stà in'empermischun incrediblain gronda e fitg fitg ambiziusa en mia situaziun. Sch'jau hai l'intenziun da s'engaschar per insatge, lura vi jau far quai cun engaschament cumplain. Jau sun persvadì d'avair prendì la dretga decisiun per mai.



Il landamma da Tavau ha inoltrà sia demissiun sin la fin da questa perioda da legislatura che cuzza fin la fin da quest onn. FOTO Y. BÜRKL

*Schizunt Vossa partida, la Partida liberala, è apparentamain stada surstada da Vossa demissiun. Datti entaifer la pld, la partida predominanta da Tavau, gia aspirants per Vossa successiun? Quai tant pli ch'era la pps cun Valérie Favre Accola ha gia signalisà interess d'occupar quesa sutga.*

## Ina greva decisiun

La comunicaziun n'è betg stada ina surpraisa, il cuntegn ch'jau veglia chalar apparentamain bain. Dentant vegn la

Partida liberaldemocratica sco la gronda partida che stat dapi decennis en la responsablad politica a Tavau a savair co reagiar en questa situaziun.

*Durant il temp da Voss presidi èn cunzunt ils gronds problems finansials dal spital da Tavau daventads virulents. Han ins gia chattà ina soluziun per quest problem?*

Il Spital Tavau SA è actualmain en in process da restructuraziun e renovaziun. En cumparegliaziun cun auters spitals en noss chantun ademplescha il spital da Tavau sias prestaziuns cun marcantamain dapli persunal. Perquai èsi stà necessari d'analisar en ina pro-

cedura stentusa e cumplitgada tut las spartas, las incumbensas e las proceduras. En quest connex na stattan betg mo l'engaschament ed ils custs dal persunal, mabain generalmain il potenzial d'optimaziun en il focus. Nus avain gia cuntanschì fitg bler, nus stuain dentant er impunder dapli temp per realisar mesiras structuralas damai ch'igl è necessari d'adattar quella a la dumonda ed als basegns che sa midan.

*Tge sfidas ha la vischnanca da Tavau anc da schliar ils proxims onns?*

Il svilup d'ina vischnanca è in process current e permanent. In pitschen

sguard sin la planisaziun da finanzas dals proxims onns revelescha in'entira paletta da projects planisads u gia instradads. Nus essan satisfatgs e pudain esser loschs che Tavau è abel da finanziar quests process da svilup e renovaziun ord atgna forza. En l'onn current tutgi da dar dumogn ad intgins projects pli gronds sco la finiziun dal stadion da hockey, la furmaziun da l'Arkadenplatz cun in nov tract da cultura, las novas directives davart la planisaziun dal territori, l'augment da l'attractivitat da la senda enturn il lai, pliras vias da gaud, diesch indrizs sutterrans per la dismessa da rument, in'ulteriura etappa da la renovaziun da la Promenada e duas iniziativas popularas per scumandar fieus artificialis e per stgaffir abitaziuns per pretschs favuraivels cun subvenziuns communalas. Ultra da quai datti in'entira retscha d'ulteriurs projects che ston vegnir inicialisads u realisads.

## Landamma cun corp ed olma

*Tge fa Tarzisius Caviezel a la fin da quest onn suenter ses pensiunament?*

Per il mument hai jau sulet decidì da chalar la fin da l'onn sco landamma da Tavau. Differents mandats en cussegls administrativs u suprastanzas d'uniuns exequesch jau anc vinavant, uschia er il presidi dal cussegl d'administraziun dal Spital Tavau SA, quai sin giavisch expressiv da l'executiva communal. Il pensiunament total n'è pia betg il tema. Jau ma legrel d'avair suenter mes temp sco landamma dapli temp e peda per mias obligaziuns privatas ch'èn magari vegnidas in pau a la curta en il decurs dals ultims set onns da lavur.